



27 Disyembre 2015

Kapistahan ng Banal na Mag-anak

Taong K

## Mga Pamilyang Nakasentro sa Diyos, Nagpapasalamat at Umaasa

**S**a taong ito, ang Kapistahan ng Banal na Mag-anak ay siya ring huling Linggo ng taon. Ito’y pagkakataon para itaas natin ang ating isipa’t kalooban sa Diyos sa pagpapasalamat sa maraming biyayang ipinagkaloob Niya sa ating mga pamilya sa taong malapit nang matapos. Bagamat hindi natin lubos na alam ang lahat ng biyayang natanggap natin sa Panginoon, ang bahagya nating alam ay higit nang sapat sa buong pusong pasasalamat, lalo na sa Eukaristiyang ito.

Ngayon di’y panahon para marapat nating ihabilin ang ating pamilya at lahat ng pamilya sa buong mundo sa pag-iingat ng Banal na Mag-anak ng Nazaret sa bagong taong magsisimula. Ang Panginoon ay siya nawang maging sentro ng ating pamilya. Ibigin nawa natin at paglingkuran Siya, tulad ng ginagawa nina Hesus, Maria, at Jose. Patnubayan Niya nawa tayo kung paano Niyang minahal at iningatan ang Banal na Mag-anak ng Nazaret.



### PASIMULA



#### Pambungad

(Ipahahayag lamang kung walang awiting nakahanda.)

**Mga pastol nagsidalaw kay Hesus na bagong silang, nakahiga sa sabsaban, kapiling n’ya’y ang magulang na Maria’t Joseng banal.**

#### Pagbati

**P** –Ang biyaya at kapayapaan ng Diyos Ama at Panginoong Hesus-kristo ay sumainyong lahat.

**B** – At sumaiyo rin!

#### Pagsisisi

**P** –Natitipon tayo rito ngayon bilang pamilya ng Diyos, buong pananalig nating hilingin ang Kanyang pagpapatawad, lalo na para sa mga kasalanan laban sa ating sariling mga kapamilya. (Manahimik saglit.)

**P** –Panginoong Hesus, patawarin mo ang kawalan namin ng

pasiyensiya, paggalang, at kalinga sa aming mga kapamilya. Panginoon, kaaawaan mo kami!

**B** –Panginoon, kaawaan mo kami!

**P** –Panginoong Hesus, patawarin ang pagkukulang naming manalanging kasama ng aming mga kapamilya. Kristo, kaawaan mo kami!

**B** –Kristo, kaawaan mo kami!

**P** –Panginoong Hesus, patawarin mo ang kawalan namin ng malasakit sa kapakanan at kapayapaan ng lalong malaking pamilya ng aming parokya. Panginoon, kaawaan mo kami!

**B** –Panginoon, kaawaan mo kami!

**P** –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

**B** –Amen!

### Papuri

**B** – Papuri sa Diyos sa kaitaasan at sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesuskristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesuskristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

## Panalangin Pambungad

**P**—Ama naging makapangyarihan, pinagkalooban mo kami ng ulirang huwaran ng angkan, na sina Hesus, Maria at Jose, ang Mag-anak na banal. Sa pagtulad namin sa kanilang mabuting pagsusunuran kami nawa’y magkamit ng walang maliw na kaligayahan sa pamamagitan ni Hesukristo kasama ng Espiritu Santo magpasawalang hanggan.

**B**—Amen!

### PAGPAPAHAYAG NG SALITA NG DIYOS



**Unang Pagbasa** Sir 3:2-6.12-14

*Ang paggalang ng mga anak sa kanilang mga magulang ay isang mahalagang sangkap sa pagkakaroon ng isang maligayang pamilya. Iyan ang katotohanang itinuturo ni Ben Sira sa Unang Pagbasa ngayon.*

**L**—Pagpapahayag mula sa Aklat ni Sirac

Ang mga ama ay binigyan ng Panginoon ng kapangyarihan sa mga anak, at iniutos niya na sundin ng mga anak ang kanilang ina. Ang gumagalang sa kanyang ama’y nagbayad na sa kanyang kasalanan, at ang nagpaparangal sa kanyang ina’y parang nag-iimpok ng kayamanan. Ang gumagalang sa kanyang ama’y paliligayahin naman ng kanyang mga anak, at ang panalangin niya’y agad diringgin ng Panginoon. Ang nagpaparangal sa kanyang ama at nagdudulot ng kaaliwan sa kanyang ina, ay tumatalima sa Panginoon; pahahabain ng Diyos ang kanyang buhay. Anak, kalingain mo ang iyong ama pag siya’y matanda na, at huwag mo siyang dudulutan ng sama ng loob habang nabubuhay. Pagpaumanhinan mo siya kapag nanlalabo na ang kanyang isip; huwag mo siyang lalapastanganin ngayong nasa kasibulan ka na ng iyong lakas. Ang paglingap mo sa iyong ama ay di makakalimutan ng Panginoon, iyan ay magiging kabayaran sa iyong mga kasalanan.

Ang Salita ng Diyos!

**B**—Salamat sa Diyos!

**Salmong Tugunan** Awit 127

**B**—*Mapalad ang sumusunod na taong may takot sa D’yos!*

R. M. Velez



\* **Mapalad ang bawat tao na sa Diyos ay may takot, ang maalab na adhika’y sumunod sa kanyang utos. Hindi siya magkukulang sa anumang kailangan, ang buhay ay maligaya’t uunlad ang kanyang buhay.** **B.**

\* **Sa tahanan, ang asawa’y parang ubas na mabunga. Bagong tanim na olibo sa may dulang ang anak n’ya.** **B.**

\* **Ang sinuman kung ang Diyos buong pusong susundin, buhay niya ay uunlad at laging pagpapalain. Mula sa Sion, pagpapala nawa ng Diyos ay tanggapin, at makita habang buhay, pag-unlad ng Jerusalem.** **B.**

**Ikalawang Pagbasa** Co 3:12-21

*Pagmamahalan, paggalang at malasakit sa isa’t isa ang mahahalagang katangian ng bawat pamilyang Kristiyano. Ganyan ang mensahe ni San Pablo sa mga mananampalataya ng lahat ng panahon.*

**L**—Pagpapahayag mula sa Sulat ni Apostol San Pablo sa mga taga-Colosas

Mga kapatid: Kayo’y hinirang ng Diyos, itinalaga para sa kanya at minamahal niya. Kaya’t dapat kayong maging mahabagin, maganda ang kalooban, mapagpakumbaba, mabait at matiisin. Magpaumanhinan kayo at magpatawaran kung may hinanakit kayo sa isa’t isa. Pinatawad kayo ng Panginoon kaya’t magpatawad din kayo. At higit sa lahat, mag-ibigan kayo pagka’t ito ang buklod ng ganap na pagkakaisa. At paghariin ninyo sa inyong puso ang kapayapaang kaloob ni Kristo, sapagkat ito ang dahilan kaya kayo tinawag upang maging bahagi ng isang katawan. Magpasalamat kayong lagi. Ang mga salita ni Kristo ay itanim ninyong mabuti sa inyong isip. Magpaalalahanan kayo at magturuan nang buong kaalaman. Umawit kayo ng mga salmo, mga imno, at mga awiting espirituwal, na may pagpapasalamat sa Diyos. At anuman ang gagawin ninyo, maging sa salita o sa gawa, gawin ninyong lahat sa pangalan ng Panginoon

Hesus, at sa pamamagitan niya’y magpasalamat kayo sa Diyos Ama.

Mga babae, pasakop kayo sa inyu-inyong asawa, sapagkat iyan ang kalooban ng Panginoon.

Mga lalaki, ibigin ninyo ang inyu-inyong asawa, at huwag silang pagmamalupitan.

Mga anak, sundin ninyong lagi ang inyong mga magulang, sapagkat ikinalulugod iyan ng Panginoon.

Mga ama, huwag ninyong kagalitan nang labis ang inyong mga anak, at baka manghina ang kanilang loob.

Ang Salita ng Diyos!

**B**—Salamat sa Diyos!

**Aleluya**

**B**—Aleluya! Aleluya!

**Kapayapaan ni Kristo at Salita n’yang totoo, nawa’y manahan sa inyo. Aleluya! Aleluya!**

**Mabuting Balita** Lu 2:41-52

*Ang Banal na Mag-anak ng Nazaret ay tunay na madasalin at tapat sa mga panrelihiyong kaugalian ng mga Israelita. Ganito ang pagpapakilala sa kanila sa Ebanghelyo ngayong tungkol sa “Pagkakita kay Hesus sa Templo.”*

**P**—Ang Mabuting Balita ng Panginoon ayon kay San Lucas

**B**—**Papuri sa iyo, Panginoon!**

**Taun-taon, tuwing Pista ng Paskuwa, ang mga magulang ni Hesus ay pumupunta sa Jerusalem.**

At nang labindalawang taon na siya, pumaroon sila gaya ng dati nilang ginagawa. Pagkatapos ng pista, sila’y umuwi na. Nagpaiwan si Hesus sa Jerusalem ngunit hindi ito napansin ng kanyang mga magulang. Sa pag-aakala ng isa na si Hesus ay kasama ng isa, nagpatuloy sila sa maghapon paglalakbay. Nang malaman nilang hindi siya kasama, siya’y hinanap nila sa kanilang mga kamag-anak at kakilala.

Hindi nila siya matagpuan, kaya’t bumalik sila sa Jerusalem upang doon hanapin. At nang ikatlong araw, natagpuan nila si Hesus sa loob ng templo, nakaupong kasama ng mga guro. Nakikinig siya sa kanila at nagtatanong; at ang lahat ng nakarinig sa kanya ay namangha sa kanyang katalinuhan.

Nagtaka rin ang kanyang mga magulang, nang siya’y makita. Sinabi ng kanyang ina, “Anak, bakit naman ganyan ang ginawa mo sa

amin? Balisang-balisa na kami ng iyong ama sa paghahanap sa iyo.” Sumagot siya, “Bakit po ninyo ako hinahanap? Hindi ba ninyo alam na ako’y dapat na nasa bahay ng aking Ama?” Ngunit hindi nila naunawaan ang pananalitang ito.

Siya’y umuwing kasama nila sa Nazaret, at naging isang masunuring anak. Ang lahat ng bagay na ito ay iningatan ng kanyang ina sa kanyang puso. Patuloy na lumaki si Hesus. Umunlad ang kanyang karunungan at lalong kinalugdan ng Diyos at ng mga tao.

Ang Mabuting Balita ng Panginoon!

**B – Pinupuri ka namin, Panginoong Hesuskristo!**

## Homiliya

### Sumasampalataya

**B –** Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesuskristo, iisang Anak ng Diyos, Panginoon nating lahat. Nagkatawang-tao siya lalang ng Espiritu Santo, ipinanganak ni Santa Mariang Birhen. Pinagpaka-sakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

### Panalangin ng Bayan

**P –** Nananalig sa Panginoong humirang sa ating maging mga miyembro ng isang pamilyang Kristiyano at ng Simbahan, manalangin tayo para sa lahat ng pamilya sa mundo:

**B – Sa pamamagitan ng Banal na Mag-anak, Panginoon, dinggin mo kami!**

\* Para sa mga dakilang pamilya ng Simbahan at sangkatauhan:

Nawa lahat ng kanilang kapamilya ay makalaspag ng pag-iingat ni Hesus, Maria, at Jose. Manalangin tayo! **B.**

\* Para sa lahat ng pamilyang Pilipino: Nawa mapanatili silang magkakabuklod at magkakasundo ng kanilang pananampalatayang Kristiyano at tulong ng pamilyanan. Manalangin tayo! **B.**

\* Para sa mga pamilya ng mga mahihirap at mga migrante: Nawa ingatan ng kanilang mga kapamilya ang pananampalataya, pagkakaisa, at katapatan sa relihiyon, sa kabila ng mga kahirapang pangkabuhayan. Manalangin tayo! **B.**

\* Para sa mga nabubuo ngayong pamilya: Nawa makatagpo sila ng inspirasyon sa pamilya ng Nazaret at mabuhay alinsunod sa mga pangaral ni San Pablo tungkol sa buhay pamilya. Manalangin tayo! **B.**

\* Para sa ating sariling pamilya: Nawa maghari ang kapayapaan ni Kristo sa bawat kapamilya, at pagbuklurin tayo ng tapat na pagmamahalan at pagpapatawaran. Manalangin tayo! **B.**

\* Tahimik nating ipanalangin ang ating mga pansariling kahalilingan. (*Tumigil saglit.*)

Manalangin tayo! **B.**

**P –** Panginoong Diyos, pagpalain Mo ang lahat ng pamilya sa buong mundo. Ilapit Mo sa Iyo at sa isa’t isa ang lahat ng miyembro ng bawat pamilya, at ingatan Mo sila sa Iyong kapayapaan at pagmamahal. Sa pamamagitan ni Kristong aming Panginoon.

**B – Amen!**

### PAGDIRIWANG NG HULING HAPUNAN



**P –** Manalangin kayo . . .

**B –** Tanggapin nawa ng Panginoon itong paghahain sa iyong mga kamay, sa kapurihan niya at karangalan, sa ating kapakinabangan at sa buong Sambayanan niyang banal.

### Panalangin ukol sa mga Alay

**P –** Ama naming Lumikha, sa pagganap namin sa hain ng pakikipagkasundo, kami nawa’y tuwangan ng Mahal na Birhen at ni San Jose sa aming pagdalangin para maging matatag ang mga mag-anak

sa iyong kagandahang-loob at kapayapaan sa pamamagitan ni Hesuskristo kasama ng Espiritu Santo magpasawalang hanggan.

**B – Amen!**

## Prepasyo ng Pasko III

**P –** Ama naming makapangyarihan, tunay ngang marapat na ikaw ay aming pasalamatan sa pamamagitan ni Hesuskristo na aming Panginoon.

Sumilay sa amin ang pagkakataong makipagpalitang-handog sa iyo ngayon. Inako ng iyong maaasahang Anak ang pagkatao namating alangan at hamak. Kahit kamatayan namin ay kanyang natikman upang kami’y makasalo sa buhay na walang hanggan.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan:

**B – Santo, santo, santo . . .**

## Pagbubunyi

**B –** Aming ipinahahayag na namatay ang ‘yong Anak, nabuhay bilang Mesiya at magbabalik sa wakas para mahayag sa lahat.

### PAKIKINABANG



**B –** Ama namin . . .

**P –** Hinihiling namin . . .

**B –** Sapagkat iyo ang kaharian at ang kapangyarihan at ang kapurihan magpakailanman! Amen!

## Paanyaya sa Kapayapaan

### Paghahati-hati sa Tinapay

**B –** Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

**Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.**

## Paanyaya sa Pakikinabang

**P –** Ito ang Panginoong Hesus, ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

**B –** Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.



## Antipona ng Pakikinaabang (Ipahayag lamang kung walang awiting nakahanda.)

Ang Poong D'yos nating mahal ay nakitang nananahan dito sa lupang ibabaw. S'yay kaisa at kapisan ng buong sangkatauhan.

### Panalangin Pagkapakinabang

**P**– Ama naming mapagmahal, kaming iyong pinapakinabang sa piging na banal ay gawin mong makapamuhay gaya ng Banal na Mag-anak. Matapos naming pangatawanan ang aming mga pananagutan sa lupang ibabaw, kami nawa'y makasalo sa kanilang kasiyahan sa kalangitan sa pama-magitan ni Hesuskristo kasama ng Espiritu Santo magpasawalang hanggan.

**B**– Amen!

### PAGWAWAKAS



**P**– Sumainyo ang Panginoon.

**B**– At sumaiyo rin!

**P**– Magsiyuko kayo at ipanalangin ang pagpapala ng Diyos. (Manahimik saglit.)

Pagbuklurin nawa ng Panginoon ng Pagmamahal ang inyong mga pamilya sa kapayapaan at paglilingkod sa isa't isa.

**B**– Amen!

**P**– Tulutan Niya nawa kayong magtulungan sa mga oras ng mga pagsubok.

**B**– Amen!

**P**– Pagkalooban Niya nawa kayo at inyong mga kapamilya ng mabuting kalusuga't maayos at banal na pamumuhay.

**B**– Amen!

**P**– Pagpalain nawa kayo ng makapangyarihang Diyos: Ama, Anak, at Espiritu Santo.

**B**– Amen!

**P**– Humayo kayo sa kapayapaan upang mahalín at paglingkuran ang mga miyembro ng inyong pamilya.

**B**– Salamat sa Diyos!

## SA IKALILIGAYA'T IKABABANAL NG ATING MGA PAMILYA

Ang sama-samang pagdarasal ng pamilya ay waring di na karaniwan ngayon. Marami ang dahilan: kani-kanya nang lakad, magkakaiba ng oras, mga praktikal na kahirapang magkatipun-tipon . . . Ngunit, mayroon pa rin namang ilang mga magulang na gabi-gabi ay kasama pa rin ang kanilang mga anak para sa ilang saglit ng paghinilay sa Salita ng Diyos, sama-samang pagdarasal, at pagrorosaryo. Sila rin ang dumadalo bilang pamilya sa pagdiriwang ng Eukaristiya kung Linggo. Sa gayon sila humahango ng lakas, pagkakasundo, at pagkakaisa. Gayundin, sila'y inspirasyon sa buong pamayanang pamparokya. Kapag nagkakatipon ang pamilya sa pagdarasal, ang mga magulang at ang mga anak ay waring napasasailalim ng kapangyarihan ng kanilang Amang Diyos.

Ang isang pamilyang araw-araw na nagpapatibay ng pakikipagtipan sa Panginoon ay mahirap magkaroon ng mga di pagkakasundo, alitan, inggitan, o karahasan ng mga magulang, o pagrerebelde ng kanilang mga anak.

Ang mga pamilyang sama-samang nagdarasal ay tunay ngang mistulang “munting Simbahan.” Dumami pa sana ang tulad nila!

Sa pamilya nagmumula ang mga pagbabago, pagkat dito tayo natututo ng paggalang at pagtulong sa kapwa, katarungan, pagbibigay, at pagmamahal sa isang di makasarili at praktikal na paraan.

Ang pamilyang pinananahan ng Diyos ay isang pamilyang payapa. Gayon ang Banal na Mag-anak sa Nazaret. At ang taunang pagdiriwang ng kapistahan nito ay hindi lamang isang karapat-dapat na pagpupugay sa tatlong miyembro nito. Ito ay isa ring paanyaya at pampasigla sa atin para matulad ang ating pamilya sa pamilya nina Jose, Maria, at Hesus noon – isang masaya't payapang kanlungan ng pag-ibig sa Diyos at sa kapwa, at kung saan nananahan din ang Diyos.



### 2016 POCKET PLANNER & PRAYER BOOK

- Buwanang Palatuntunan na . . . Aklat-dasalan pa . . . !
- Nagtatampok sa pagdiriwang sa Taon ng Eukaristiya at ng Pamilya, at “Jubilee of Mercy”



Mabibili sa

Word & Life Center, National Book Store,  
at tindahan ng mga babasahing banal



WORD & LIFE  
PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org, wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, Sr. F. Santos, SMI, G. Ramos, R. Molmog, D. Daguio,

V. David • Illustrations: A. Sarmiento, B. Cleofe • Circulation: F. Edjan